

PLEIV SUMVITG

Rapport annual 2020 dil president

Stimau sur Saji

Preziadas parochianas, preziai parochians

Cun restricziuns e mascrinas essan nus serimnai oz cheu en sala da scola a Sumvitg per la radunonza da pleiv. Sco president descha ei a mi da rapportar sur il curriu e passau dapi la davosa radunonza generala dils 16 da settember 2020.

La pandemia ha era fatg in streh tras il calender dallas fiastas da baselgia dils davos 8 meins. Mo 50 personas, desinfectar ils mauns, purtar mascrina, tener distanza, scamond da cantar ed aunc outras restricziuns han era valiu per ils survetschs divins e per tut las occurrenzas en baselgia. Las fiastas da Nadal e Pastgas havein nus festivau a moda fetg sempli. Dapi varga in onn succedan las sepulturas mo pli el ravugl dalla famiglia. Concerts en baselgia, surtut el temps d'Advent e Nadal han muncau. Nus tuts havein stuiu sendisar vid restricziuns e scamonds ch'han midau bravamein nies mintgadi. La veta sociala ed era nossa cuminonza da pleiv ha pituu fetg. Lein sperar che la pandemia seigi plaunet surmuntada e che nus tuts saveien puspei returnar tier ina veta senza pli grondas restricziuns.

Nies plevon, sur Saji ei s'engaschaus a moda exemplarica per embellir ils survetschs divins cun cant e musica ord la boxa e cun porscher a parochianas e parochians la pusseivladad d'assister al survetsch divin via internet. Tut quei ei stau pusseivel mo grazia allas bunas enconuschientschas dalla technica da sur Saji.

Legreivlamien havein nus ussa survegniu in niev uestg. Cun Joseph Maria Bonnemain ha il papa, suenter ch'ils canonis han desistiu da lur dretg d'elecziun, elegiu in um che para dad esser gest quei pastur ch'igl uestgiu da Cuera basegna ussa suenter tons onns da disvaris da tuttas uisas. Lein dar a nies niev uestg la confidanza e sperar ch'el hagi in bien maun ed in spert aviert che gidi el ad anflar ina buna via co tgamunar quei vast uestgiu tras tut las sfidas actualas. Jeu sperel che siu num Bonnemain ni per Romontsch "Bienmaun" seigi buca mo num mobein era la marca da sia lavur sco uestg.

Enqual fiasta ha, malgrad las restricziuns tuttina giu liug.

Fiasta dall'emprema sontga communiun 2020

La fiasta dall'emprema sontga communiun che vess giu da ver liug la primavera han nos 5 premcommunicants cun lur famiglias astgau festivar la dumengia dalla Rogaziun federala 2020 en baselgia a Sumvitg.

Creisma

In'jamna pli tard, ils 27 da settember han nos 11 confirmands festivau lur fiasta dalla Creisma cun avat Vigeli dalla claustra da Mustér. Era quella fiasta ha giu liug muort il plaz e las restricziuns en baselgia a Sumvitg.

Cun cant reduciu eisi tuttina aunc reussiu da dar in tec tempru da fiasta, aschibein tier la fiasta dall'emprema sontga communiun sco tier la fiasta dalla creisma.

Dumengia alva 2021

Era la fiasta dall'emprema communion 2021 culs 6 affons dalla 3. classa ha giu liug mo el stretg ravugl dallas famiglias ils 11 d'avrel da quest onn en baselgia a Surrein.

La suprastonza da pleiv engrazia zun fetg a Ti, sur Saji per Tia lavur supplementara en quei temps da pandemia. In grond engraziament admittel era a cantaduras e cantadurs, a lecturas e lecturs, allas organistas ed als organists sco era allas calustras ed als calusters ch'ein segidai a moda speciala duront quei temps extraordinari. Engraziament s'auda era a parochianas e parochians per lur pazienza e per la buna disciplina cun tut quellas restricziuns en baselgia.

Sontget a Marcalina

Sco gia menziunau el rapport digl onn vargau ha la cumpignia da mats sut la reschia dil capitani Fadri Monn ed il capomiradur Claudio Cabalzar renovau il sontget a Marcalina. La lavur da pictur ha nies convischin e pictur Meinrad Bearth da Surrein fatg. La davosa renovaziun datescha digl onn 2000. La renovaziun actuala ha custau rodund 6'300 francs e figurescha el quen annual dalla pleiv sut "Fundaziun ecclesiastica pervenda Sumvitg".

Grond engraziament als giuvens dalla cumpignia da mats ed a tut ils auters gidonters per la beinreussida sanaziun dil sontget. Il manteniment da quei Sontget, vul dir il schubergiar e mirar che tut seigi en uorden, succeda entras Theolinda e Meinrad Flury. Grond engraziament ad els dus per quei survetsch.

Revisiun dall'orgla en baselgia a Rabius

El meins october 2020 han il construider d'orglas Peter Kraul, che ha construiu l'orgla da Surrein, e sia dunna exequiu ina revisiun totala dall'orgla ella baselgia a Rabius. Ils cuosts per quella lavur ella summa da rodund 27'000 francs ein vegni finanziaj ord il legat da Lydia Brenn sco gia informau ella davosa radunonza da pleiv.

Niev scaldament en casa pervenda a Surrein

Il scaldament ella casa pervenda da Surrein era vegls ed ei fuva da quintar cun in remplazzament els proxims onns. Muort las novas prescripziuns restrictivas pertuccont sanaziuns da scaldaments naven digl 1. da schaner 2021 ha la suprastonza decidu da remplazzar il scaldament avon la fin digl onn 2020. Ils cuosts per la nova pegna cun tut las lavurs accessoricas muntan a circa 20'400 francs e figurescha el quen annual sut "fundaziun ecclesiastica pervenda Surrein".

Purificaziun el cudisch funsil

Terren sper baselgia a Rabius / Parcadis via Catat a Rabius

El decuors digl atun ein ils contrats corrispundents denter ils artavels Tuor-Desax, Otmar Maissen e las fundaziuns ecclesiastias baselgia e pervenda Rabius vegni purificai el cudisch funsil Cadi.

Nos morts

Tier la veta sauda era la mort e nossa communitad da pleiv ha stuiu prender cumiau dapi il settember 2020 da 11 parochianas e parochians. Lein cuort seregurdar dad els:

	datum da mort	vegliadetgna
Marjia Tavelli-Suk, Rabius	20-09-2020	81 onns
Anton Mathiuet-Holliger, Surrein	06-10-2020	73 onns
Hermine Bearth, Rabius	11-10-2020	91 onns
Irena Venzin-Deplazes, Rabius	17-11-2020	71 onns
Rosa Monn-Foppa, Sumvitg	02-12-2020	86 onns
Berta Schmidt-Wenk, Sogn Benedetg	17-12-2020	75 onns
Linus Lechmann-Caminada, Schluein/Sumvitg	05-01-2021	86 onns
Sofia Cajacob-Maissen, Sumvitg	01-02-2021	89 onns

Anna Casanova-Berini, Sumvitg	22-02-2021	86 onns
Giusep Tomaschett, Sogn Bendetg	25-02-2021	66 onns
Maria Lechmann-Spechtenhauser, Sumvitg	14-04-2021	93 onns

Possien nos defuncts che han bandunau nus dapi la davosa radunonza da pleiv sco era tut ils auter defuncts en nos santeris guder la beadedad celestia. Nus seregurdein dad els en in cuort memento.

Pagina internet

Fagei diever dallas informaziuns sin nossa pagina d'internet www.pleivsumvitg.ch. Vos saveis da tut temps s'informar sur dils fatgs dalla pleiv, survetschs divins, fotografias da fiastas, occasiuns specialas, annunzias da mort ed auter bia ch'interessescha forsa in u l'auter.

Che nossa pagina ei adina sil stan actual procura noss'administratura Giuliana.

Engraziel fetg persuerter.

Culla fin november 2020 ha **Petra Duff** remess siu engaschi ella baselgia a Cumpadials. Petra fuva responsabla per la decoraziun e per schubergiar. In cordial engraziament alla Petra per siu engaschi. La decoraziun ha la calustra Bernadetta Cavigelli surpriu ed il caluster Marcel ei responsabels pil schubergiar.

Flurin Cathomas ch'ei staus dapi biars onns caluster dalla caplutta en Bogn Tenegia ha medemamein remess siu uffeci ed era quei post havein nus saviu surdar a nies caluster Marcel. A Flurin Cathomas admittel in cordial engraziament per siu engaschi en favur dalla caplutta da Nossadunna dalla neiv.

Il november vargau ha nies caluster **Marcel Pöhl** terminau cun grond success il cuors da caluster ch'el ha visitau duront 3 jamnas a Nossadunna. Ell'intervesta culla redactura dalla Quotidiana ha Marcel ofniau che caluster seigi sia professiun da siemi ed il pli bi mument egl onn 2020 seigi stau cu el hagi saviu ch'el hagi dumignau cun success igl examen da caluster.

Preziau Marcel, nus tuts gratulein a Ti sin quei success e giavischein a Ti vinavon bia satisfacziun e plascher cun Tia lavur da caluster, cun tut Tia preziada lavur en ed entuorn las baselgias e capluttas confidadas a Ti. Engraziament special era per Tiu engaschi sco organist ella baselgia da Rabius.

Extradas dalla baselgia

Deplorablamein ha la suprastonza da pleiv era stuiu prender encunter 8 extradas dalla baselgia da parochianas e parochians da nossa pleiv. Ils davos 4 onns ei il diember dallas extradas varius denter 2 e 6 per onn. In fatg che fa gia daditg quitaus a nus ed aunc a biaras autras pleivs. Mintga extrada ei da deplorar e tuttina stuein nus era veser che biars, en special da nos giuvens ch'ins entaupa buca fetg savens en baselgia, stattan tuttina fideivels alla baselgia ed a nossa pleiv e gidan aschia a tener quella en in bien equilibrer finanziel.

Engraziaments

In special engraziament admittel a nies plevon sur Saji che para dad esser sevivius en fetg bein cheu tier nus, per sia gronda e zun preziada lavur per nossa pleiv, surtut duront il temps dalla pandemia, per ils bials survetschs divins e buns priedis e la fetg buna collaboraziun che nus astgein haver cun el. Jeu sperel ch'el hagi vinavon bia plascher cun nus e nus cun el.

En quei mument engraziel allas personas che segidan cun sur Saji cun translatar texts en romontsch. Mo cun agid da quel e tsel sa nies plevon emprender spert nies lungatg e persuerter engraziel a tut tgi ch'ei cheu engaschau.

Grond engraziament allas gruppas da liturgia da Rabius, da Sumvitg/Cumpadials e da Surrein cun lur menadras per lur zun preziau engaschi en pastoraziun ed en baselgia.

Alla mendra dil cussegl pastoral Gabriela Lutz-Soliva ed allas commembras Alice Cajacob, Maja Deplazes, Doris Janka, Daniela Wieland ed al commember Fabian Bearth sco era a tut quellas e quels che segidan els singuls loghens da baselgia cul cussegl pastoral engraziel grondamein per lur zun preziada lavur.

Als ministrants e allas ministrantas ch'han sunter las vacanzas muort il lockdown puspei repriu il pensum da ministrar sco era als affons ch'han da cuort entschiet a ministrar engraziel jeu fetg. En num dalla suprastonza da pleiv engraziel jeu era a lur geniturs che motiveschan e promovon lur affons tier quei survetsch aschi impurtont per nossa communitad. Avon las vacanzas da stad lein nus porscher ad els ina sentupada cun ina buna tscheina sco segn d'engraziament.

Allas calustras ed als calusters da nossas baselgias e capluttas ed a tuts quels che segidan ultra da quels pil beinfuncziunar dils survetschs divins e cun decorar las baselgias e capluttas nies grond engraziament.

All'organista Evelina Giger ed als organists Armon Bearth, Retus Giger, Flurin Monn e Marcel Pöhl da nossas treis baselgias admittel in grond engraziament per la promptadad dad esser cheu cu ei drova per accumpignar ils survetschs divins ed autras occasiuns a l'orgla.

Ils treis cors da nossa pleiv han dapi ils mars 2020 vacanzas sfurzadas. Nus sperein ch'els astgien d'atun puspei entscheiver cun lur emprovas e producciuns e nus selegrein gia oz da puspei astga guder cant e musica festiva tier nossas fiastas e perdanonzas.

Als ugaus-baselgia, ugaus-caplutta ed agl ugau-santeri Luis engraziel grondamein per lur preziada lavur per nossas baselgias e capluttas, pils santeris ed el contuorn da quels.

Allas uniuns da dunnas da Rabiun e Surrein che segidan adina cu ei fa basegns els singuls loghens da baselgia admittel in grond engraziament.

Special engraziament al vicepresidente ed actuar Armin Candinas per sia zun preziada lavur en suprastonza e per la fetg emperneivla collaboraziun.

Senza la fetg cumpetenta ed el ver senn dil plaid nunstunclenteivla lavur da nossa administratura Giuliana funcziunas fetg bia en nossa pleiv mo malamein ni insumma buca. Il vast menaschi da nossa pleiv pretenda di per di engaschament davart dall'administratura ch'enconuscha nossa pleiv e sias particularitads sco negin e che ei adina promta da segidar cun plaid ed ovra nua ch'ei fa basegns. Las restricziuns davart dil coronavirus pretendan aunc adina dall'administratura in respectabel surpli da lavur, ch'ella ademplescha fetg speditiv e cun bien maun.

Era per sia lavur da secretariat dalla pleiv che cumpeglia las annunzias el Fegl ufficial Surselva e las impurtaziuns els cudischs dalla pleiv, las diversas informaziuns a parochianas e parochinas ed auter bia engraziel ad ella zun fetg.

A vus tuts che essas vegni cheu oz mo era a tut las autras parochianas e parochinas da nossa pleiv engraziel per la participaziun a nossa communitad e pil sustegn e la beinvulientscha visavi tut quels che s'engaschan sin ina moda ni l'otra per nossa pleiv.

A nos attempai e malsaus che san muort vegliadetgna ni malsogna buca pli prender activamein part da nossa cuminonza giavischel jeu bia pazienza e curascha.

Possi Dieus accumpignar nus cun siu buntadeivel maun sin tut nossas vias.

Walter Deplazes, president